



UPA 2019/20

26/3-2019

Randi Vestergaard Evaldsen

**Siunnersuut: Inatsisartut inatsisaasa assigiinngitsut allangortinneqarnerat aamma akileraarutit akitsuutillu kiisalu aningaasanik nuussinikkut isertitat pillugit Inatsisartut inatsisaat nr. xx xx. xxx 2018-imeersoq.**

(Aningaasaqarnermut Nunanilu Avannarlerni suleqatigiinnermut)

(Siullermeerneqarnera)

Demokraatini tunngaviumik nuannaarutigaarput siunnersuummi matumani siunertarineqarmat malittarisassat inatsisillu assigiinnerusut ingerlaavartumillu naleqqussarneqartartussat atorineqalernissaat siunertarineqarmat, taamatullu eqaannerulersinnissaat pitsaanerulersinnissaallu siunniunneqarluni. Aammali isumaqarpugut inatsisit naleqqussaanerillu atortussanngortinneqartussat innuttaasunut iluaqutaalerumaartut minnerpaamik allaffissornermut sunniuteqarlutik.

Nuannaarutigaarput uani siunnersuummi siunertarineqanngimmat pisortat isertitaqarnerulernissaat, innuttaasut aallerfiginerisigut imaluunniit nunami maani namminersorlutik suliffiutillit aallerfigineqalinngimmata, allaffissornerulli iluani aningaasartassai nassaarineqassamaartut pitsanngorsaanikkut immikkoortut pineqartut ataqatigiinnerulernissaat. Tamanna uagutsinnut pitsaasuvoq tusarlugu aamma qaqugumulluunniit qulakkeertuarumavarput inuit namminneq aningaasarsiorlut sapinngisamik nammineq atugassaminnik sinneqarnerusalernissaat pisortat akuuffiginngisaannik. Taamaattumik isumaqarpugut akileraartarnikkut, inunnik isumaginninnikkut ineqarniarnikkullu ataqatigiinnerusoqarnissaata pitsanngorsarnissaa aallartiffigissallugu ajunngilluinnartoq, ajoraluartumik takusinnaagatsigu sulisartut ooriutaanik arsaartuineq pisarteq.

Siunnersuutip kingunissaa pitsaasoq iluanaarutissartaalu ilaatigut tassaavoq aaqqissuussinnermut siusinnerusumut naleqqiullugu siusinaarlutik pensionisiallit utoqqalinersiallillu ajunnginnerusumik atugaqalissammata, amerlasuut iluanaarniarsinnaanngimmata taamaattumillu allaat aalajangertarlutik nunarput qimaannarniarlugu, aappariit atugaat amerlasuutigut ajornerusarmata naak inuiaqatigiinnut suli ilapittuutaarusukkaluarlutik aammalu imminnut pilersorlutik.

Siunnersuut Aningaasaqarnermut Akileraartarnermullu Ataatsimiititaliamut innersuupparput, appassaaneerineqannginnerani.